

RTR Radiotelevisiun
Svizra Rumantscha

SRG SSR

www.rtr.ch

al puls dal Grischun

RADIO

GIEVGIA, 18 D'AVRIGL

14.03 L'INSTRUMENTALA (REP.)

Musica ruassaivla

Emna sontga, l'emna nua ch'el temp para quasi da star airi ch'ins è en ina fasa pli calma. Era «L'instrumentala» dad oz vegn per ina giada pli ruassaivla.

Redacziun: Christa Soliva

19.00 LA POPULARA

Or da l'archiv – registraziuns veglias



«La populara» dad oz deditgain nus a registraziuns dal temp passà. Vos udis schottischs, polcas, valsers e mazurcas sco: «in der Mühle Passugg», «il marsch pintg», «Tanz in Cinskel», «Am Kerstelenbach» ed auters tocs vegls. Ina truvaglia tut speziala è ina registraziun da la fin dals onns 50, in toc da la chapella Men Schmidt da Sent, registrà durant in bal da Bumaun a Ftan.

Redacziun: Jacob Prevoost

20.03 MARELLA (REP.)

Il luf e nus

Il luf è gia daditg turnà en il Grischun. Ma pir il davos onn ha el entschet a sa derasar pli e pli fitg. En la «Marella» lascha Casper Nicca udir, tge che la preschientscha dal luf fa cun nus.

Redacziun: Casper Nicca

VENDERDI, 19 D'AVRIGL

08.03 / 20.03 VITA E CRETTA

Arvo Pärt: La passiu da Jesus tenor son Gion

Venderdi sontg ans regurdain nus da la passiu e mort da Jesus Cristus vid la crusch. La passiu da Cristus ha fatschentà ed ispirà ils artists sur tschientaners.



L'elavuraziun musicala la pli famusa è la «Passiu da son Gion» da Johann Sebastian Bach. Nus proponin oz dentant la Passiu dal cumponist eston Arvo Pärt. El è in dals cumponists contemporans ils pli populars. Quai ha da far cun sia abilitad da cumbinar tuns novs cun tradiziuns musicalas. Era en sia «Passio» prenda el si ideas e models dal temp medieval. Sia musica trasmetta en moda sensuala il misteri da la passiu, giustia, mort e speranza.

Redacziun: Ursin Defuns

14.03 ARTG MUSICAL

Stabat mater dolorosa

«L'Artg musical» spezial per venderdi sontg porta duas ovras dal pitir, suffrir e murir da Jesus Cristians.



Franz Schubert (1797-1828): cun 19 onns ha el scrit ses «Stabat mater» e quai tenor vers tudestgs da Klopstock. Nus dudin ina registraziun fatga cun il chor ed orchester dal Radio Berlin. Agostino Stef-

fani (1654-1728): ses «Stabat mater dolorosa» è stà la davosa cumposiziun dad el, e tenor el sia capo-ovra. Il Coro della Radiotelevisione svizzera, I Barocchisti e solistas vocals han interpretà quest'ovra sut la direzziun da Diego Fasolis.

Redacziun: Giusep G. Decurtins

SONDA, 20 D'AVRIGL

09.03 PROFIL

Silvia Gartmann (33) – «Clichès ein lungurus»



Sco scolasta da religiun ed etica a la scola chantunala a Cuira è «clischès» envers tschertas religiuns adina puspè in tema en sia instrucziun. Sco dunna ch'è maridada cun in um da la China vegn ella confruntada era en sia vita privata adina puspè cun clischès. Ed ella sezza na correspunda era betg al cliché da la scolasta da religiun: ella è giuvna, sportiva e taidda musica da metal.

Redacziun: Prisca Bigliel

11.03 MAGAZIN DA CULTURA

Games: sport, cultura, passiu



Super Mario, Call of Duty u Fortnite: Dar games tutga tar in dals hobis ils pli derasads en nosa societad. En l'America empleneschun turniers da gamers entirs stadions. En Svizra è la scena bler pli pitschna, dentant en grond moviment. I dat adina dapli «e-sportists» – co che gamers professionals vegnan numnads – ed er il dumber da creaders da gieus crescha. Il «Magazin da cultura» sa dumonda sche games èn ozendi da renconuscher sco in bain cultural – cun in'egliada en la pratica: Nus avain dà gieus cun Curdin Albin (35) da Cuira, in giugader da hobi passiu.

Redacziun: Donat Caduff

12.45 DA NUM E DA PUM

Hermann

Per cas è Hermann, en rumantsch Armon, Armin, Dermon u Monn, l'onomatic da questa sonda da Pasca. Hermann Joseph von Steinfeld (1150-1241?) era in spiritual tudestg che era entrà en la claustra premonstratensa a Steinfeld, nua che sia fossa è oz anc in lieu da pelegrinadi enconuscent. Pervia da ses spualizi mistic cun Maria vegn el era numnà Joseph. Ses auter surnum è «il sontg da la maila». Enfin oz portan ils pelegrins mails frestgs per metter sin sia fossa. La dumonda da declarar sontg quest um era vegnida fatga gia 1626, ma pir l'onn 1958 l'ha papa Pius XII sanctifitgà. Buna Pasca e bella «Pasquetta»!

Redacziun: Chasper Pult

DUMENGIA, 21 D'AVRIGL

08.06 / 20.03 VITA E CRETTA

Da las parallelas tranter Pessach e Pasca

La festa gidieua Pessach e la festa cristiana Pasco coincidin quest onn puspè ina giada, sco l'onn da la passiu e mort da Jesus. Questas duas festas han bleras parallelas. Omadus plets, Pessach e Pasca han per exempel la medema ragisch. E gidieus e cristians cundividan differentas

mangiativas tipicas per quests dis, sco per exempel ils ovs ubain la chorn-tschun.



«Vita e cretta» ha discuri cun Christina Tuor-Kurth, prediganta e professuessa per il Nov Testament a l'Universitad da Basilea, davart il ferm connex tranter questas duas festas.

Redacziun: Maria Victoria Haas

09.03 MARELLA

Tavulin litterar – «La calamita» e «Cuntradas imaginarias»

Al Tavulin litterar sa schuntran questa giada Bettina Vital e Claudia Knapp.



En il center da l'emissiun stattan dus cudeschs ch'èn vegnids translats en rumantsch. Discutà vegn sur da la graphic novel «La calamita» da Lucas Harari e «Cuntradas imaginarias» da Walter Rosselli. Sco ina calamita attiran las famusas terms da Val, da Peter Zumthor, Pierre, il giuven student da Paris, si en las muntognas grischunas. Pierre vul scuvrir il misteri che lajega davos las miraglias rafinadas dal boggn. Cun ligerezza sa mova Walter Rosselli en cuntradas, ma er en la lingua, duas chaussas ch'el collia per sa distrair ed a medem temp per sa far paratrgs davart l'ir dal mund.

Redacziun: Esther Krättli

14.03 ARTG MUSICAL

Pasca en il chant rumantsch



Sü, cristians, pür s'allegrè, Magdalen'e treis Marias ni Da mort en veta eis levasu – en la Consolaziun dell'olma devoziusa u en auters cudeschs da chant chatt'ins mo paucas chanzuns per la festa da Pasca. Quels chants tipic rumantschs èn signads d'ina speranza detg pessimista. I sa tracta da melodias introvertidas. Chanzuns da Pasca giubilantas e glischantas mancan en la litteratura rumantscha. «L'Artg musical» porta talas chanzuns or da l'archiv da RTR. Munidas vegnan quellas cun las Sonatas da baselgia da Wolfgang Amadeus Mozart.

Redacziun: Giusep G. Decurtins

15.03 LA CLASSICA (REP.)

Sibelius – Inspirà da cigns

Jean Sibelius (1865-1957) vala sco il cumponist nazional da la Finlandia. Tranter auter è el vegni enconuscent cun ovras sco «Kullervo» op. 7 u «Finlandia» op. 26.

Redacziun: Yvonne Simmen

19.00 LA CLASSICA

Johann S. Bach: Kommt, eilet und lauffet...



L'oratori da Pasca da Johann S. Bach è per propi ina cumposiziun da parodia. La

cumposiziun originala aveva in auter text ed era patratgada per in'otra occasiun. En quest cas sa tracta d'ina ovra scritta sco cantata da gratulaziun per il 43avel anniversari dal cont Christian von Sachsen-Weissenfels. Quai è stà ils 23 da favrer 1725. Gist suenter ha Bach integrà questa cantata profana en in'ovra liturgica per Pasca 1725. L'oratori ha 11 numers. Nus udin il Collegium Vocale cun Philippe Herreweghe e 4 solists vocals: B. Schlick, K. Wessel, J. Taylor e P. Kooy.

Redacziun: Giusep G. Decurtins

GLINDESDI, 22 D'AVRIGL

14.03 ARTG MUSICAL (REP.)

Pasca en il chant rumantsch

«Da mort en veta ei levasu» – Pasca en chant e musica.

Redacziun: Giusep G. Decurtins

19.00 LA STAILALVA

Hits dal schlagher popular

En «La stailalva» dad oz tadlain nus in triep melodias enconuscentas dals davos onns, ma er inqual hit actual na dastga betg mancar.



«Auf zur Schafalm», uschia il titel da partenza, quai è la novischna single da la band Die Granaten. Plinavant tadlain nus Die jungen Zillertaler cun il «Tuba Sepp», lura Die Draufgänger cun lur super hit «Cordula Grün», la Miss Helvetia cun «Locker Locker», euv.

Redacziun: Christa Soliva

20.03 MAGAZIN DA CULTURA (REP.)

Games: sport, cultura, passiu

Redacziun: Donat Caduff

TELEVISIUN

GIEVGIA, 18 D'AVRIGL

11.15 CUNTRASTS SIN SRF INFO (REP.)

Alexi e Marcus – 35 onns en dus

Il film «Alexi e Marcus – 35 onns en dus» è in film davart in'amicizia musicala ch'è unica en il mund rumantsch.

17.40 TELESQUARD SIN SRF 1

L'emissiun d'infurmaziun sin SRF 1

cun suttitels tudestgs sin TXT 777 (rep. sin SRF info tranter las 18.00–22.00)

VENDERDI, 19 D'AVRIGL

19.20 PLED SIN VIA SIN SRF 1

«Pled sin via» cun Cornelia Camichel Bromeis

Tge relaziun avais Vos cun l'exclusivitat? Fasciais Vos gugent la differenza? Èsi impurtant per Vos d'As distinguer?



Mintgatant far la differenza, po esser il sal da la vita en il mintgadi. Quai mussa la ritgezza da nosa vita e da nos mund – ed ans lascha giudair noss'individualitad. L'exclusivitat en quella maniera attira noss'attenziun en ina moda positiva.

Venderdi sontg ans regorda ch'igl ha adina dà forzas che levan suttametter la vita. Jesus è mort, el è vegni mazzà. Sia tenuta però ha survivi. Sia crusch inclusa tut quels che pateschan e reunescha els. La resistenza tegna l'ultim pled.

SONDA, 20 D'AVRIGL

17.10 CUNTRASTS SIN SRF 1 (REP.)

Alexi e Marcus – 35 onns en dus



Alexi e Marcus èn dapi 35 onns ensem sin viadi musical. Els tutgan tar ils pli populars chantauturs rumantschs ed han tranter auter chantà l'imni per preservar la planira da la Greina: «Il clom dalla Greina». Durant ina tura sur la Greina reflecteschon ils dus chantauturs davart lur istorgia, els raquantan da lur messadis, plaschairs e resuns. Il film «Alexi e Marcus – 35 onns en dus» è in film davart in'amicizia musicala ch'è unica en il mund rumantsch.

17.40 MINISQUARD SIN SRF 1

Pertge discurren tuts dal incendi da la catedrala da Notre-Dame?

Incendis datti adina puspè. Savens istorgias tragicas che dattan da discurren en il vitg u en la regiun. Ordaifer la vallada u giu la Bassa interessan ils incendis lura be pli ils paucs. Tar la catedrala da Notre-Dame discurre ussa dentant l'entir mund dal incendi. Pertge èn tscherts edificis pli impurtants ch'auters e pertge è la Notre-Dame in da quels? Il «Minisquard» declera.

L'exercizi fa il maister



Quai sa Alex Beeli exact. Il giuven da 14 onns tutga gia tar ils megliers giugaders da bigliard en Svizra. Perquai trenescha el pliras giadas l'emna per perfeziunar ses giu cun las cullas coloradas. Il «Minisquard» ha visità el durant in trenament e vuli savair, tge che fa ora in bun giugader da bigliard.

Il magazin d'infurmaziun per uffants

(rep. sin SRF info tranter las 18.00–19.30)

DUMENGIA, 21 D'AVRIGL

17.25 CUNTRASTS SIN SRF 1

Lisa prenda la storta



Ils 20 d'avust 2017 ha Lisa Monn pers ses rir. Durant in'excursiun da dumengias cun il velo collidescha ella cun 39 km/h cun in auto. La fanestra davos da l'auto rumpa e taglia si ina mesadad da la fatscha da Lisa. Ella perda dus liters sang e rumpa plirs oss en fatscha. Cun quel di d'accident entschava per Lisa ina greva via per gudagnar enavos ses rir. Da quella via raquinta il film «Lisa prenda la storta».

dapli sin www.rtr.ch